

# 佛语法门经

元魏北天竺三藏法师菩提流支初译



南無本師釋迦牟尼佛

## 说明

本简体校正版《佛语法门经》电子书，根据《乾隆大藏经》大乘单译经，第 0387 部，元魏北天竺三藏法师菩提流支初译《佛语法门经》原龙藏雕板印刷影印本校正。句读仅作参考。特此说明。

仁慧草堂

二〇一七年十月

## ● 起诵仪

### 香赞

(一遍)

炉香乍爇. 法界蒙熏. 诸佛海会悉遥闻. 随处结祥云. 诚意方殷. 诸佛现全身.

南無香云盖菩萨摩诃萨 (合掌三称)

南無本师释迦牟尼佛 (合掌三称)

### 开经偈

(一遍)

无上甚深微妙法 百千万劫难遭遇  
我今见闻得受持 愿解如来真实义

# 佛语法门经

元魏北天竺三藏法师菩提流支初译

如是我闻：一时，婆伽婆住毗耶离大林楼阁上，与大比丘众八千人俱，八万四千诸大菩萨，复有学、无学无量人众，围绕说法。

尔时，会中有一菩萨，名龙威德上王，从座而起，整服右肩，右膝着地，合掌向佛，白言：“世尊！如来先说佛语修多罗诸经，复有说非佛语。世尊！此有何义？云何受持？”

尔时，佛告龙威德上王菩萨言：“善男子，如汝所问，于诸经中而说佛语非佛语者。善男子，如是非语即是佛语。善男子，善思念之，我于今者善为汝说。”

时，龙威德上王菩萨而白佛言：“善哉！世尊！愿乐欲闻。”

佛言：“善男子，言非语者，即是佛语。善男子，言佛语者，是则名为最重身业。我之所说，皆悉无有不离身业、口业、意业，彼亦无语，无能说者，亦无言者。

“善男子，诸有色语，皆非佛语。若龙威德上王，色非语，非佛语者；受、想、行、识非语，

亦非佛语。善男子，若无色语，无受、想、行、识语者，是名佛语。

“善男子，若有身、口、意业语者，不名佛语。善男子，若无身、口、意业语者，是名佛语。

“善男子，若有地、水、火、风、空界，如是等语，不名佛语。善男子，若有不说地、水、火、风、空界等者，是名佛语。

“善男子，若有贪、瞋、痴语，不名佛语。善男子，若无贪、瞋、痴语，是名佛语。

“善男子，若有漏语、及无漏语，不名佛语。善男子，若非有漏语、非无漏语，是名佛语。

“善男子，若有所希，如是语者，不名佛语。以彼佛语，不希求故。善男子，若无高下，如是语者，是名佛语。

“善男子，若有事语、非事语者，不名佛语。善男子，若有非事、非非事语，是名佛语。

“善男子，若于自性清净法上言得证者，彼非佛语。善男子，若非自性、非他性语，是名佛语。

“善男子，若有实语、非实语者，不名佛语。善男子，若无实语、无不实语，是名佛语。

“善男子，若有此语是凡夫人之所说话，此

是圣人之所说语，不名佛语。善男子，若无凡语、无圣人语，是名佛语。

“善男子，若有内语及有外语、内外语者，不名佛语。善男子，若无内语及无外语、内外语者，是名佛语。

“善男子，若于诸法，有色所依；受、想、行、识所依语者，不名佛语。善男子，若于诸法，无色可依，亦无受、想、行、识可依，如是语者，是名佛语。

“善男子，若有处语，是魔王语，是魔民语，不名佛语。善男子，若无一切诸处语者，是名佛语。

“善男子，若有色觉分别而语，受、想、行、识觉分别而语，不名佛语。善男子，若无色觉分别而语，受、想、行、识觉分别而语，是名佛语。以此义故，魔及魔民不得其便。

“复次，善男子，言菩萨者，若色无我，亦不分别非是我所，如是受、想、行、识无我，亦不分别非我所者，名为菩萨。”

时，龙威德上王菩萨而白佛言：“世尊！以何义故，而有言说？何者言说？”

佛言：“善男子，魔波卑掾。复次，善男子，

若菩萨，色不作念：‘我当如是。’受、想、行、识亦不作念：‘我当如是。’如是，菩萨于一切处，皆无有语。龙威德上王，诸善男子有上胜者，断一切语，断一切障，灭诸我慢，断一切网，离诸二见，离一切想。以无语故，云何有言？亦无可语！是故，非语名为佛语。

“善男子，以此义故，当如是知，此是佛语。

“善男子，若无身无身行，无口无口行，无意无意行，非行非非行，非谤非不谤，不生不起，无想无处，无住无没，非寂非行，谛语不动复非不动而亦不住，自然不缘亦非不缘。善男子，此是佛语。以彼无有可能语故，是名佛语。

“善男子，菩萨能作如是学已，是则名为学上上智光明佛语、清凉佛语。遍悦一切诸众生身，开发一切诸众生意，趣向佛智，受持法义；遍悦一切诸菩萨众，觉诸睡者，善入法界。是善决定向于法轮，转于法轮，击大法鼓，降诸魔众，降伏异怨，降伏一切诸外道众。是能救护向恶道者，是能庄严诸佛世界，是一切佛之所称叹，必坐道场。知是菩萨已坐道场，如是菩萨已得菩萨诸陀罗尼。”

说此佛语法门之时，圣龙威德上王菩萨，菩

提分法皆悉满足，即时获得无生法忍。二万六千诸菩萨等，得陀罗尼及诸三昧。八千比丘，得无漏法。复有八万四千众生，皆发阿耨多罗三藐三菩提心。即以神力雨种种华，供养世尊。

如来说是法门之时，圣龙威德上王菩萨及诸大众、天、人、阿修罗、迦楼罗、紧那罗、摩睺罗伽等，一切大众，闻佛所说，皆大欢喜，信受奉行。

《佛语法门经》卷终

## ● 结诵仪

### 补阙真言

(三遍)

南無喝啰怛那. 哆啰夜耶. 佉啰佉啰. 俱住俱住. 摩啰摩啰. 虎啰. 吽. 贺贺. 苏怛那. 吽. 泼抹拏. 娑婆诃.

### 三皈依

(一遍)

自皈依佛，当愿众生，体解大道，发无上心；  
自皈依法，当愿众生，深入经藏，智慧如海；  
自皈依僧，当愿众生，统理大众，一切无碍，和南圣众。

**南無佛 南無法 南無僧** (合掌三称)

**南無一切如来、应、正等觉** (合掌三称)

**南無本师释迦牟尼佛** (合掌三称)

**南無观世音菩萨摩诃萨** (合掌三称)

## 回向偈

(一遍)

诵经功德殊胜行 无边胜福皆回向  
 普愿沉溺诸有情 速往无量光佛刹  
 十方三世一切佛 一切菩萨摩诃萨  
 摩诃般若波罗蜜

## 回向偈

(一遍)

愿以此功德 庄严佛净土  
 上报四重恩 下济三途苦  
 若有见闻者 悉发菩提心  
 尽此一报身 同生极乐国



此咒置经书中可灭误跨之罪

南无护法韦驮尊天菩萨

